

清容居士集

七

清容居士集

PDG

清容居士集卷第十八

記

慶元路鄞縣學記

粵昔授受緒絕空虛固陋之學淪於人心
言理者人人殊師記問者質而不化詞章
篆刻決裂六藝糜爛而不可救師儒有憂
之據道德性命之要毫分縷析鑿鑿乎其
不可相紊也繇是士得以一其視聽皇王
之道復興於千數百年之後可謂盛矣

世祖皇帝混同區夏崇學校定國子學成

憲皆東南儒先而朱文公所說咸取以為
經史模楷於是窮徼絕域中州萬里之內
外悉家有其書然而急近功者勦取其近
侶以為口耳之實天人禮樂損益消長切
於施為所宜精思而熟攷者一以為允近
迂緩而不講至於脩身養心或相背戾而
不相侶則緣飾儼默望之莫有以窺其涖
際夫明絕學以承先聖之統可謂難矣弊
生於苟易守其說而湮其本將不勝其弊
載籍極博莫嚴於五經教人之法莫詳於

三物揚子雲云丘陵學山而不至于山惡
夫畫也鄧奮有學王文公安石為宰時延
會稽杜先生醇教之學者輩出至大二年
郡大火學燬之主邑之學曰孔文雋董儒
金始建講堂禮殿未及完而去皇慶二年
三衢姚熙載實來是歲

天子下科舉詔同知郡事吳郡張侯某顧
瞻陋蕪首曰其何以稱

上意迺率郡官而助之邑令梅君遇春丞
簿龐君滋范君祐咸曰吾長於是茲後曷

可追嚴工庀程戒隸業者咸輸以佐閱二
年夫子像成侑從有叙門廡庖庾塗牖繚
繞之屬堅密精潔學宮之制完且具矣姚
君廼曰鄞號多士昉杜先生宜作先賢祠
以祀鄞士之興其自今始乎嘗謂學校宮
室殿謁循行風俗之使者未嘗不督厲脩
繕獨教法未定雖聰明自任猶不敢高下
以議今明詔四出郡侯首創其原姚君
又能推本前人尊師之旨深有所寓桷雖
官朝廷因姚君之請知張侯之美遂以

學校之弊首叙其說庶幾吾里秀士強敏
自脩詢考耆哲篤行於顯微內外之實文
質交資上承詳延將以復乎昔時之盛則
姚君之闡微其意深矣庸刻于石願有以
俟焉

鄭山書院記

粵若古儒先各以方國所尊祭于學社自
漢而降定孔子祀餘悉徹廢今百年来始
有事于先師其居邑講習治官游衍之地
崇闡相望或者病焉夫氣流六虛神而存

之聚者易推遠者難窮聲音笑貌之感若
將企焉如弗及者理有在也合吳越楚蜀
之地咸尊以師惟朱文公

世祖皇帝一海寓定胄子學取文公訓註
為學制郡縣益遵守而祀於江南者復得
推行大德二年四明趙壽家儒科慨然請
于朝曰伊吾祖鄂州善待從文公游今
天子興是學願割田別居以祠而名曰鄮
山事甫下趙氏即世七年三山林德載氏
奉命祇事屋毀弗稱旋辟田沒不可問覈

故整地實完實成莫薦齋明陟降儼肅賓
老佐祭侯伯合餽又三年俾繫其事于石
袁桷曰維我四明薦紳先生辨釋著微實
相表裏源同流分塗殊轍一合私而惡異
標榜之弊也炳然尋訓理何外焉學以殖
身德以敦本斯道立矣執空說以為證弊
不勝舉惟性與道匪言是夸桷懼茲久願
相與勉焉林君精敏慎脩宜展於世文公
之學不墜審由是也大德丁未春後學袁

桷記

鄞縣興造記

鄞為縣延亘三百里環山帶江西為沃區
其民盡地利近東瀕為湖土廣而俗雜逐
島嶼魚鹽之利出沒于海上歲千百數林
藪川澤之隸于鄞者不假于外故號為劇
邑邑復輔城以居尤為難治縣上事郡署
曲直縱舍承指意一不得便輒指撻辱撓
閔臨相通縣勢始振後允為縣者率用是
自治而民益困矣大德七年帥府始移鎮
控扼水陸衆曰郡有二府縣益不可理八

年真定盧廷信氏丞于茲推勤服廉沉斷
靜脩罪䟽于囹訟辯于庭朞月而郡侯尊
焉大府任焉宅邑之讞咸質以定旁郡之
賊悉檄以正顧瞻四周令主簿是謀先時
縣燬經始陋庠不足廣廼撤而新鳩材于
山負者以競輸役于徒民以不病首于臺
門廳堂亭廡凡五十有楹智周而勞簡
噦然以深翼然以容謁者趨者視聽易慮
於是耆艾謹然以謠曰伊丞之來吾民不
知吏屬既荒吾民相忘彼庭開明維丞之

平雍雍其堂富民恐傷有亭是休思賢悠
悠丞之戾止毋譁以喜後兮今兮維今是
侶咸謂桷嘗職太史筆削無避溢遂不得
讓後始於乙巳之十月越明年閏月成丞
嘗為行掾中書有吏能令長忻都次為東
平周汝弼氏簿澄江朱申氏也余愛其成
紀以示後俾知鄞為可治大德十年十二
月日袁桷記

西洛書院記

河南薛公遵先君子之命建義學于永寧

矣龍頭山有故跡焉蒼崖嶄然宋元祐中
天台羅適正之大刻其上曰洛書錫禹之
地正之安定胡先生門人善水利所至通
陂隄屯田之美按地志永寧併長水縣長
水東臨洛川記傳云洛書所出今龍頭山
新立禹祠而薛公仰止亦近得請于朝
為書院遂更其名曰西洛且俾夫後人知
禹洛書之誠有自粵昔九疇垂象示文夸
誣相矜祖緯齷符漢世明經之士汨於休
咎莫窺其真歷千餘年儒先大興闡天人

之祕方圓相通正學以明然同黨之說勝
一以為已是一以為傳授數精理湮皇極
之建卒無以大通民有恒性君師作之以
修以綏如彼北辰樞紐運行內靜若動莫
窮其化允厥有生極廼固有性者為聖復
者為賢作而新之維后是訓庸保其極則
民永以乂保極者民作極者君運而制諸
若允之在握輪之在御皆聽命於我孰先
後焉孰終始焉四時萬化之理繇是而脩
謂之收叙夫豈捨己而隨彼也昔大禹佐

理水土攸平君臣交修抑亦有定制洛為
天下中碩儒訓傳家有其書慎厚遜讓猶
有先王之遺風陞西洛之堂者當慨然以
思謹其執中將見夫作人如新之驗由鄉
而達于邦國勵之翼之示諸于掌皇極之
訓其效可成也薛公名友諒溫密有文今
為翰林直學士推先志之私淑煥而廣之
為屋凡若干楹又將延師以教後之學者
而屬筆於桷故以昔之所聞者著為之記

建城夫子廟堂記

景城縣東南三十里有故城焉曰建城漢
為中水縣地金大定中以其地北臨潯沱
南薄御河徙縣於今所二水交流名之曰
交河焉皇慶元年保定王君領縣簿事循
河故堤水落冬月先期率民以補其缺頽
霖雨時至則因其防而巡督之河不橫流
政簡民佚觀風省俗聿來于茲望其井屋
聯屬誠阜且康於是士林之秀曰劉國芝
耆老韓昌等言曰建城舊有先聖廟城址
日圯而廟莫敢廢在昔許文簡公安仁嘗

撤而新之未幾金亡居室燬蕩而獨歸然
以存至元戊子國芝之父禎遂易於文簡
公之故居以詔于里士弦誦之聲家至而
日化矣王君周旋里門念崇而新之於是
治書侍御史張侯完以書來曰吾里夫子
廟易代有存許劉儒先作新之志子盍廣
諸敢以楮幣若干為里人勸於是下令輯
工奠方闡基表植巷道庭宇邃嚴以丹以
塗論講有堂游息有廡明年率其儒生落
而祀之廼介刑部員外郎葉蘇君俾志其

事粵自塾庠序學之制不明而士無所於
學州縣有學率歲時奠祭貿貿道途謹脩
其故常於造士乎何有成周之學脩四代
而畿內為序十有二為庠三百左右之塾
復不預焉噫先王教學之興何其盛也學
必釋菜於先師虞庠為鄉學有堂有序得
行釋菜之禮記禮者之言也釋菜於廟則
自魏晉始也遵古之學從今之禮損益之
變不亦可乎且鄉校不毀鄭人美之今
天子下詔明鄉里選舉之法建城之學者